

■ GLOSSA

Il Palaver: Noss sguard sin l'emna

DA SILVIO CAMENISCH

Nus dus experts amis Ramming e Tschuur n'essan betg vesaivels per Vos a chasa, fa nagut, essan perquai tuttina realmain preschents en l'elevaziun ed emissiu Il Palaver. Nus essan preschents ina giada per emna, duas giadas fiss bunamain garmadi, pensas er uschia Gian, jau er. Nus essan fitg fitg gugent si qua en l'escha dals schefs il rest da l'emna, silmain uschè gugent essan nus realmain preschents via microfon directamain tar Vos a chasa. Nua che Vos stais adina qua or en la pampa il hinterland, la retroterra da noss bels idioms. Sontg sontg sontg.

Nus cuntanschain tuts cun nossa devoziun discursiva Il Palaver, generada concepida e producida en nossa chasa, tenor nossa sumeglia. Suentar nossas emprimas appariziuns acusticas discursivas, sin nossas undas, tirain nus bilantscha mo positiva sco als Dis da litteratura Klagenfurt da la Rumantschia, schain: cuntaschè per bler il quorum supponì, cun in pau cutizzar in pau negoziar avant e durant. Fa nus betg superbis, da quit grond. Glorielas, famus e gloria na duvrain nus betg. Nus betg, Gian. La radio-novela, unica, è stada noss'idea. Palavrassan nus dus betg, pavlass nagin nossas audturas noss audi-



turs en fomaz. I drova urgentamain noss pavlar, noss palavrar.

En il Palaver emnil palavrain nus dus da trais temas fitg fitg brischants. Sco verbum n'è «palavrar» da noss savair mai vegnì conjugà (beugen, gramm. konjugieren) d'in uman, gnanc d'in grammaticher dal fatg. En las grammaticas rumantschas, nus avain tantas, chattain nus nagliur la conjugaziun «palavrar», ed er betg en la grammatica da Dieu. Qua faschain nus dus, ti ed jau ed jau e ti, lavur da piunier: Jau palavr. Nus palavrain. Quellas duas furmas unicas duessan tanscher per noss diever emnil. E nus na stessan betg enta pes, vegniss quest verbum, conjugà tras, daventà charn, prendì si cun corp da tuttas grammaticas. Nus na cumandain betg mo ans recumandain. Grazia.

Nus palavrain, ergo, essan nus. Nus essan realmain preschents, em-

nilmain, tar nossas charas audturas noss chars audturs, directamain a chasa. Stuais Vos gnanc vegnir tar nus, vegnin nus meglier tar Vos, sco ditg directamain en chasa ed uigl e garascha, nua che Vos lais, lain nus er. Emnilmain datti betg dapertut, na sa chapeschi betg da sasez, tar nus sa chapeschi da sasez; fashain nus gugent per nossa clientel. Nossa clientel sa grà da nossa Palaver, meglier noss palavrar sco novum en noss bels programs. Auters pavlan selvaschinas en il criv enviern, nus palavrain a selvaschinas en stivas chaudas sursilvanas ed engiadinaisas, il rest è per las vulps.

Duessi dar eveniments da purtada extraordinaria en noss territoris d'emissiu: nozzas promientas, perfin nova uvestga auxiliara aposta per craismas problematicas, eigens für schwierige Firmenspendungen en la retroterra, concret tar glied difficiltusa da la Cadi, pli concret da la Casa da Diu, nus discutassan nus palavrassan surlonder en noss Palaver spezial; Gian, ti en la rolla dal pledader (da radio) filolog, jau mez en quella dal pledaderteolog. Ensemen essan nus fermes, ed in team. Pia, sche Vos avais veglia tadlai noss proxim Palaver palavrantdiscursiv: sin questas medemas uondas. Adia e stai bain.